

# Perpustakaan hibrid perkhidmatan terkini sesuai peredaran zaman

Um 11/8/10 MS30 UUM

KUBANG PASU 10 Ogos - Perpustakaan Sultanah Bahiyah Universiti Utara Malaysia (UUM), Sintok di sini bukan sekadar menjadi pembekal maklumat kepada pelajar khususnya di institusi pengajian tinggi awam (IPTA) itu malah memainkan peranan cukup penting dalam menyingkap peranan perpustakaan secara lebih menyeluruh pada masa kini.

Langkahnya menganjurkan Seminar Kebangsaan Teknologi Maklumat Di Perpustakaan, di Pulau Pinang baru-baru ini mendedahkan bahawa hasil ledakan teknologi maklumat pada masa kini membuktikan peranannya untuk menyingkap lebih jauh perkhidmatan perpustakaan khususnya di negara ini.

Seminar selama tiga hari itu meningkatkan pengetahuan dan penguasaan teknologi maklumat, mewujudkan kolaborasi kepakaran selain memberi pendedahan teknologi maklumat terbaru dalam kalangan peserta.

Ini kerana peranan perpustakaan pada hari ini telah berubah dari sebuah gedung penyimpanan maklumat kepada pusat penyebaran ilmu yang dinamik dalam penciptaan dan penemuan pengetahuan baru.

Bertemakan Transformasi Perpustakaan Melalui Teknologi Maklumat, seminar tersebut menyingkap perkembangan dan



**HESTER MOUNTIFIELD**



**FAIZAH PAKHRURAZI**



**CALVIN CHUAH ENG GHEE**

transformasi yang berlaku di perpustakaan atau pusat maklumat di Malaysia hasil perkembangan teknologi maklumat pada masa kini.

Peserta-peserta mewakili 18 IPTA manakala tujuh daripada IPT swasta, agensi kerajaan dan swasta termasuk Universiti Sains Malaysia (USM), Universiti Teknologi Nanyang (Singapura), Universiti Malaya (UM), Universiti Putra Malaysia (UPM) dan syarikat Nervesis Sdn. Bhd.

Sebanyak 14 kertas kerja merangkumi pelbagai aspek berkaitan perpustakaan masa kini dibentangkan kepada pustakawan, pensyarah, pegawai teknologi maklumat, petugas pusat sumber dan pusat maklumat dari seluruh Malaysia.

Seminar tersebut dirasmikan Timbalan Ketua Setiausaha (Pengurusan), Kementerian Pengajian Tinggi, Datuk Omar Abd. Rahman yang mewakili Menteri Pengajian Tinggi, Datuk Seri Mohamed Khaled Nor-

din. Turut hadir Naib Canselor UUM, Prof. Dr. Mohamed Mustafa Ishak.

Pemangku Ketua Pustakawan Perpustakaan Sultanah Bahiyah UUM, Salleh Hudin Mustaffa berkata, kehadiran Internet membolehkan perpustakaan dirangkaikan dan perhubungan di antara sesebuah perpustakaan

dilakukan dengan mudah.

"Teknologi yang digunakan juga membolehkan perpustakaan menyimpan jumlah maklumat yang besar tanpa had fizikal, tidak seperti dahulu di mana koleksi perpustakaan bergantung pada saiz lantai atau ruang fizikal sesebuah perpustakaan," katanya.

Sementara itu, Pemangku Pustakawan Universiti Auckland, New Zealand, Hester Mountifield berkata, perpustakaan perlu sentiasa berusaha untuk meningkatkan nilai tambah menerusi peningkatan fungsi perpustakaan yang boleh dicapai dengan melakukan inovasi dan kreativiti.

"Penerokaan perkhidmatan baru dalam perkhidmatan perpustakaan dijalankan dengan melaksanakan inovasi dari semasa ke semasa untuk mengadaptasi kejayaan perpustakaan di luar negara.

"Dengan itu perpustakaan akan berintegrasi dengan penggunaannya dan akan

meningkatkan kebergantungan, keupayaan dan kebolehpercayaan mereka (pengguna) terhadap perpustakaan," tambahnya.

Pustakawan Malaysian Biotechnology Corporation, Kuala Lumpur, Faizah Pakhrurazi berkata, melalui seminar tersebut para peserta didedahkan dengan perubahan yang selalunya diadaptasikan oleh perpustakaan sebagai tempat untuk pembacaan dan mencari bahan rujukan bagi pendidikan jarak jauh.

"Di sini kita tahu menggunakan perpustakaan sebagai pakej pendidikan jarak jauh di mana tidak lagi perlu hadir ke perpustakaan tetapi sekadar melayarinya melalui jarak jauh," katanya.

Pegawai Perpustakaan Kolej Tunku Abdul Rahman Cawangan Pulau Pinang, Calvin Chuah Eng Ghee menyifatkan seminar itu membolehkan para peserta bertukar-tukar pandangan dan penguasaan teknologi maklumat sebelum mengaplikasikannya di perpustakaan masing-masing.

"Ia turut membina perspektif tentang perpustakaan yang lebih luas dalam meningkatkan pengetahuan dan jaringan kerjasama untuk memberi perkhidmatan yang lebih berkualiti, efisien dan menyeluruh kepada pelanggan," ujarnya.

Tambahnya, ia menilai kesan dan transformasi terhadap perkhidmatan perpustakaan, hasil daripada penggunaan teknologi maklumat dan mewujudkan jalinan perkongsian pintar di antara perpustakaan untuk kemudahan bersama.